

Акафист Господу Иисусу Христу Грядущему

Кондак 1

Взбранный Воеводо и Господи, міра Создателю, с верою и любовью припадающе к Тебе Грядущему, вопию Ти: Иисусе, Господи Грядущий, вниди в дом души моя.

Икос 1

Ангелов лики со страхом и трепетом взирали на Тя, Господи, егда волею нас ради распялся еси; мы же, грешнии, что возможем глаголати? Но дерзаем по слову Твоему молитися Ти:

Иисусе, Радосте наша, яви нам милость Твою;

Иисусе, Любы Неизреченная, даруй нам возлюбити Тя всем сердцем и всем помышлением;

Иисусе, Желание наше, не отрини нас, ищущих Тя;

Иисусе, Свете Тихий, осияй нас светом Благодати Твоея;

Иисусе, Надеждо наша, не остави нас заблуждающихся;

Иисусе, вопрошающий нас - «Что творити вы на Земли?» даруй нам творити только Твоя повеления;

Иисусе, не возбранивый имети образ Твой, даруй нам выну имети образ Тя Грядущаго;

Иисусе, входящий в дома людей Твоих, вниди в мя и преобрази мя всего;

Иисусе, даруй ми разумети, что есть благая воля Твоя;

Иисусе, многомилостивый, не отступи от мене за нерадение мое;

Иисусе, Господи Грядущий, вниди в дом души моя.

Кондак 2

Вем, яко велие утешение имам в последовании Тебе, Господи, даруй ми николиже отступати повелений Твоих, да спасаемый Тобою зову: Аллилуиа.

Икос 2

Обещавый вечеряти с приемлющими Тя, соделай мя причастника вечери Твоея тайныя:

Иисусе, стоящий и толкущий у двери сердца моего, даруй ми уразумети зов твой;

Иисусе, призывающий нас ко очищению, даруй ми познати нечистоту мою;

Иисусе, Свете истинный просвети мя, да возлюблю заповеди Твоея;

Иисусе, ищущий призвати грешных, отверзи слух мой, ко слышанию глагола Твоего;

Иисусе, утружденный на пути Своем, не имеющий где главу преклонити, не возгнушайся внити в дом мой;

Иисусе, вем яко наг есмъ, нищ и убог, но благодатию Твоею покрый мя;

Иисусе, Милосте безконечная, не остави мене немощного;

Иисусе, Врачу, исцели язвы страстей моих;

Иисусе, вся могий, коснися очес моих, во еже не видети мне суеты;

Иисусе, Премилостевый, очисти мя всего и спаси;

Иисусе, Господи Грядущий, вниди в дом душмоея.

Кондак 3

Глаголевыи пречистыми устами Твоими: «Ей, гряду скоро, аминь». Даруй ми со возлюбленным

учеником Твоим взывати: «Ей, гряди, Господи Иисусе!» Сего ради в трепете ожидая пришествия Твоего, зову Ти: Аллилуиа.

Икос 3

Призвавый апостолов от сетей рыбарских на служение Истине Твоея, призови и мя от суеты житеския, да последую Тебе с веселием и любовию глаголя:

Иисусе, простивый ученику Своему трикратное отречение, даруй ми его покаяние;

Иисусе, ни единым словом, но воззрением токмо на ученика Своего приведый его к Себе, даждь и мне слезы покаяния;

Иисусе, коснися души моя, да раскаюся о неправде моей;

Иисусе, взираяй на произволение сердечное, помилуй мя;

Иисусе, рекий апостолу Петру: «Гряди по Мне», повели и мне Тебе последовати;

Иисусе, глаголавый: «Блажен еси Симоне вар Иона, яко исповеда Мя Сыном Божиим», - даруй и мне его исповедание истинное;

Иисусе, разрешивый сему ученику идти по водам во сретение Твое;

Иисусе, даруй и мне силу благодатную, не убояться волн житейских;

Иисусе, простерший руку к Петру утопающему, прости и мне руку помощи;

Иисусе, рекий: «Кто не со Мною, тот против Мене», даруй ми пребывати всегда с Тобою;

Иисусе, Господи Грядущий, вниди в дом души моя.

Кондак 4

Возлюбивый, Господи, весь род человеческий, научи и мя возлюбити ближних моих, да просвещен и обожен Тобою, выну зову Ти: Аллилуиа.

Икос 4

Призываяй вся труждающиеся и обремененныя ко упокоению, даруй ми потрудиться ради имени Твоего святого, не убоявшись зноя полуденнаго не ведаю бо егда день мой к вечеру приклонится, и да вопию Ти:

Иисусе, Свете святыи, освяти повседневный труд мой;

Иисусе, Утешителю, даруй ми николи же возскорбети о тягости труда сего;

Иисусе, Радование мое, даруй ми понести всякую скорбь ради Имени Твоего;

Иисусе, научи мя познати образ Твой в каждом человеке;

Иисусе, Огнь пополяющий, попали мои злые помыслы;

Иисусе, совесте моя, даруй ми горько плакаться о гресех моих;

Иисусе, даруй ми возлюбити весь мир яко творение Твое;

Иисусе, смирение истинное, помози ми во смирении послужити страждущим;

Иисусе, благоухание жизни, облагоухай труд мой;

Иисусе, даруй ми познати Царствие Божие внутри себе;

Иисусе, Господи Грядущий, вниди в дом души моя.

Кондак 5

Се прихожду к Безсмертному Царю и Богу моему,
со умилением вопия: Аллилуиа.

Икос 5

Вем, Господи, яко скорбями, недугами и
различными печальми болезни - души наша
врачуеши. Сего ради, взирая на многострадальную
Землю нашу, где дерзкою рукою неверия Храмы
разрушаются, святые иконы оскверняются,
исповедники веры умучиваются, со слезами
вопию Ти:

Иисусе, Господи, Ты Сам гонимый из храмов
Твоих, даждь нам силу терпети скорби за имя Твое;

Иисусе, Странником в мире являющийся, помози
нам во изгнании и странствии нашем;

Иисусе, Агнче Божий, возмем грехи мира сего;

Иисусе, Милостивый, возьми бремя грехов наших;

Иисусе, Пречудный, страдания за мир
претерпевый, утоли наши многоразличные скорби;

Иисусе, Странниче в мире утомленный, даруй
покой утомленной душе моей;

Иисусе, учеников призывавый, даруй и мне
небоязненно тещи за Тобою;

Иисусе, Господи Предвечный, Благослови всех к
Тебе стремящихся;

Иисусе, Всеведующий, Ты веси, яко люблю Тя;

Иисусе, вся могый, помози ми и прости мя;

Иисусе, Господи Грядущий, вниди в дом души
моей.

Кондак 6

Вем, Господи, яко тесными вратами и многими скорбями подобает внити нам в Царствие Небесное, тако укрепи стопы наша, да не возвратимся вспять міром побеждаеми, но да зовем Ти: Аллилуиа.

Икос 6

На вечери, в дому Симона прокаженного, не отринул еси грешницу, пришедшую с миром многоценным помазати нози Твоя, но рекл еси: Отпускаются греси ея мнози, яко же и возлюбила еси много. Иисусе благий, реки и о моих гресех такожде, яко и аз грешный вопию Ти:

Иисусе, Пастырю добрый, призови мя яко заблудшую овцу;

Иисусе, Судие Праведный, Судом Твоим вразуми мя;

Иисусе, ими же веси судьбами спаси мя;

Иисусе, постивыйся в пустыне и напоследок взалкавый, даруй ми истинную жажду правды Твоя;

Иисусе, быв искушен всяческими, помози ми во искушениях моих;

Иисусе, рекий: «Не может человек творити ничесоже, аще не будет ему свыше дано»;

Иисусе, пошли ми помощь Твою с Небеси;

Иисусе, не уклони сердце мое в словесе лукавствия;

Иисусе, Помоще моя, помилуй мя;

Иисусе, Радование мое, спаси мя;

Иисусе, Господи Грядущий, вниди в дом души моея.

Кондак 7

Повелел еси нам, Господи, быть мудрыми, искупующе время, яко дние лукавии суть и время сокращенно; вразуми мя, да спасаемый Тобою, вопию Ти благодарне: Аллилуиа.

Икос 7

Слыша Тайновидец апостол Иоанн Глас с Небеси глаголющий: «Напиши: блаженни мертви умирающие о Господе, ей, глаголет Дух, да починут от трудов своих, дела бо их ходят вслед с ними». Слыша сии слова и аз ужасаюся - не имам бо дел ко оправданию и ничто же благое сотворих. Сего ради, от сердца вопию Ти:

Иисусе, Судие Праведный, не осуди мя по делом моим;

Иисусе, Премилостивый, виждь нерадение и зло содеянное мною;

Иисусе, Заступниче, помилуй и спаси мя;

Иисусе, не возгнушайся внити в оскверненный храм души моея;

Иисусе, Наставниче, научи мя покаянию;

Иисусе, Сыне Божий, даждь ми, нищему, Твое богатство неизжидваемое;

Иисусе, соделай мя рабом Твоим.

Иисусе, пусто изжих время многоценное, данное ми для спасения - прости мя;

Иисусе, приими мя, яко в единонадесятый час пришедшаго;

Иисусе, научи мя оправданием Твоим;

Иисусе, Господи Грядущий, вниди в дом души моея!

Кондак 8

Зриши, Господи, яко великою скорбию сердца человеческия исполняются от зла неверия во дни наши сущия; сего ради даруеши благодатное обновление икон святых в знамение обновления духа нашего, познав в сем всеблагое промышление Твое, благодарственно вопием Ти: Аллилуиа.

Икос 8

Дано бысть видение возлюбленному ученику Твоему, яко под алтарем избивенных за слово Божие и за свидетельство еже имеаху, возопиша гласом велиим, глаголюще: «Доколе, Владыко Святый и Истинный, не судиши и не мстиши крови нашае от живущих на Земли?» И дано быша коемуждо их ризы белы, и речено бысть им, «да починут еще время малое, дондеже скончаются и братия их имущии избивены быти яко же и тии». Слышахом сие, возношу Ти скорбный глас мой:

Иисусе, Святый, утоли на Земли нашей скорби великия;

Иисусе, Праведный, укрепи любовь Твоею исповедников святых веры, ныне люте страждущия;

Иисусе, по всей Земли Российской проходящий, очисти ю Своими стопами;

Иисусе, утомленный на пути Твоем, укрепи народ Свой от глада и болезней погибающий;

Иисусе, Сам в нищете сый, укрой от хлада и нищеты братию нашу;

Иисусе, приими фимиам молитв святых в тайне Тебе подвижающихся;

Иисусе, ради сих праведных, помилуй нас;

Иисусе, вем яко видеши всякую каплю слез на очах наших;

Иисусе, вем, яко вместо разрушенных храмов на Земли Российстей воздвизаеши храмы нерукотворенныя на небеси;

Иисусе, созидаеши их из душ человеческих, ими же да украсится Царствие Божие;

Иисусе, Господи Грядущий, вниди в дом души моя.

Кондак 9

Возжелах просвещения Твоего, Господи, даруй ми, жаждущему, каплю благодати Твоя, да вопию Ти: Аллилуиа.

Икос 9

Ангельския силы, Серафимы и Херувимы и вся воинства Небесныя со страхом и благоговением взирают на великое смирение Твое. Ты убо, Господи Сил, Царю царствующих, Господь господствующих, смилив Себе, и зрак рабий прием по Земли нашей скорбной шествуеши из града в град, из веси в весь, всех созываяй Сам, на вечерю, Тобою уготованную, мы же слыша сие благодарно вопием Ти:

Иисусе, Благословенный, благослови всех призывающих Тя;

Иисусе, Благий, ко грешным пришедый, призови не ведающих Тя ко спасению;

Иисусе, не возбранивый детям приходити к Тебе, просвети детей невинных, в безверии воспитанных;

Иисусе, сохрани в тайном подвиге на всяком месте, в лесах и весях Тебе подвизающихся;

Иисусе, Великий Архиерею, иереев верных мученическую кончину Тебе ради приемлющих -укрепи светом благодати Твоея;

Иисусе, возсияй в сердцах гонителей, да познают Тя, Бога Истинного;

Иисусе, к великому всенародному покаянию нас призови;

Иисусе, Сострадающий нам, горе народное, глад, нужду, нищету и тьму духовную развей невечерним Светом Твоим;

Иисусе, призови и мя грешного ко спасению, не дерзающего приступить к Чертогу Твоему;

Иисусе, просвети одеяние души моя, да вниду в Онъ желанный;

Иисусе, Господи Грядущий, вниди в дом души моя.

Кондак 10

Ты рекл еси Господи: «Побеждающему дам сидети со Мною на престоле Моем, яко претерпевый до конца, той спасен будет». Приемля сей глагол Твой сердце мое, в радости духовной, благодарственно вопиет Ти: Аллилуиа.

Икос 10

Увиде апостол Иоанн народ мног, его же исчисти никто не может, от всякого языка, стоящий пред Престолом Божиим, и людей облеченных в ризы белы и слыша глас глаголющий: «Сии суть, иже приидоша от скорби великия и исправиша ризы своя и убелиша их в крови Агнца», сего ради вопием Ти:

Иисусе, Веселие Истинное, возвесели душу мою;

Иисусе, сподоби и мя послужити Тебе, якоже сии искупленнии от Земли служат Ти день и ночь в Царствие Твоем;

Иисусе, Творче мой, сотвори, да будет ми весь мир Храмом Твоим;

Иисусе, научи мя, да будет сердце мое престолом Тебе, и таинство жизни Твоея да совершается в нем;

Иисусе, услыши вопль и плач народа Русского;

Иисусе, Спасителю, прими от мене немощное славословие сие, яко жертву хваления;

Иисусе, во святом причащении Тела и Крови Твоея освяти мя;

Иисусе, даруй ми в терпении понести Крест свой;

Иисусе, Радосте моя, даруй ми, да в сердце моем благодарственно поклоняюсь Ти;

Иисусе, вем, яко слышаще каждое воздыхание скорби нашея, прими ю во очищение душ наших;

Иисусе, Господи Грядущий, вниди в дом души моя.

Кондак 11

В немощи человека Сила Божия совершается: аз немощен и духом, и телом, но укрепи и ободри мя Благодатию Своею, да познав милость Твою, радостно воспою Ти: Аллилуиа.

Икос 11

Рекл еси учеником Своим и всем верующим в Тя: «в мире скорбны будете, но скорбь ваша в радость будет». Вем убо, Господи, Тобою реченное и вопию Ти:

Иисусе, Свете Истинный, осияй страну нашу Российскую;

Иисусе, мир Твой даруй душе моея;
Иисусе, укрепи мя, да оставлю вся ради Тебе;
Иисусе, даруй ми узкими вратами приидти к Тебе;
Иисусе, Свете Тихий, уготовь сердце мое на
вечерю Твою;

Иисусе, даждь ми все дни жизни моея послужити
Тебе;

Иисусе Спасе Благий, научи мя кротости и
смирению, научи мя разумети нужду ближняго;

Иисусе, не хотению своему, но благой воле Твоя
да последую;

Иисусе, скорби міра сего во спасение да послужат
ми;

Иисусе, Свете Незаходимый, просвети сердца
народов во тьме неверия сущия;

Иисусе, Господи Грядущий, вниди в дом души
моея.

Кондак 12

Умиленным сердцем и душею, радостію о Тебе
исполненным, предстою пред Ликом Твоим,
поклоняюся милосердію Твоему, воспевая Ти:
Аллилуиа.

Икос 12

В горнице Сионстей на Тайной Вечере глагола
еси учеником Своим: «мир оставляю вам, мир Мой
даю вам, не якоже мир дает, Аз даю вам. Да не
смущается сердце ваше и да не устрашается». Слышахом сие, реченное Тобою, вопію Ти:

Иисусе, укрепи мя на брань не с кровію и плотию,
но с миродержателями тьмы века сего;

Иисусе, научи мя прияти вся орудія Божія;

Иисусе, да возмогу противиться врагу в день лют;

Иисусе, препояшь чресла моя истиною и облеку
меня в броню правды;

Иисусе, обуи нози моя во уготование
благовествования миру;

Иисусе, научи мя восприяти щит веры и шлем
спасения;

Иисусе, помози ми молитися на всяко время
духом;

Иисусе, умудри мя пребывати бдящим во всяком
терпении;

Иисусе, помози ми не угасити светильника души
моея;

Иисусе, даруй ми внити в сретение Твое со
светильником возженным;

Иисусе, Господи Грядущий, вниди в дом души
моея.

Кондак 13

О, Иисусе Христе, Свете Тихий, осияй мя Истиной
Твоею, да услышав зов Твой, со светильником
горящим выйду во сретение Тебе, Грядущему, и
молю Тя: вниди в дом души моея, да пою Ти:

Аллилуиа, Аллилуиа, Аллилуиа.

Сей Кондак читается трижды. И паки читается: Икос 1 и Кондак 1

Молитва

Господи, Иисусе Христе Сыне Божий,
поклоняемся Пречистому Образу Твоему, Любви
Твоея и Промыслу Твоему о нас, грешных и
недостойных рабах Твоих. Услыши нас, Свете
Истинный, мольбу и молитву с верою Тебе
приносимую, и прииди к нам благодатию Духа
Твоего Святаго, научи, умудри пребывати в Тебе,
яко же Ты пребывавши в нас. Научи нас, Благий,

молитве, добру и терпению, даруй нам дух сокрушения и дух покаяния. Отыми от нас, Господи Утешителю, дух праздности, дух уныния и неведения да оживем в Тебе.

О, Иисусе Христе Многомилостевый, Грядущий к нам! Помилуй нас и спаси, во времена сии скорбныя, молитвами Пречистым Твоея Матери, Архангелов, Ангелов, Апостолов и всех святых Твоих, от века Тебе благоугодивших.

Аминь.